



## **Aningaasaqarnermut Naalakkersuisoq**

### **TUVIORTOQ**

#### **Aningaasaqarnermut Ataatsimiititaliap suliaq nr. 01.31.06/10-00509 pillugu tallimanngornermi ulloq 3. december 2010-mi aalajangiineranik Naalakkersuisunut ilisimatitsineq.**

#### **B2171, Imaneq 27-mi oqoqarnerata kingunerisaanik ilassutitut aningaasaliissutissanik qinnuteqarneq**

Naalakkersuisut **inassutigaaat**,

- Kontomi pingaarnermi 20.30.10-mi, Namminersorlutik Oqartussat Nuummi qitiusumik allaffeqarfinnut tunngasumi, aningaasaliissutit 1.263.000 kr.-inik amerlineqassasut,
- Kontomi pingaarnermi 20.11.50-imi, Ingerlatsineranut sillimatinut tunngasumi, aningaasaliissutit 1.263.000 kr.-inik ikilineqassasut.

#### **Aningaasaqarnermut Ataatsimiititaliap oqaaseqaatai**

B-2171-imi oquit peerneqarnissaannut aningaasartuutitut matussutissanik aningaasaliissuteqarnissaq Naalakkersuisut suliami matumani qinnutigaat.

Suliamili Aningaasaqarnermut Ataatsimiititaliaq aalajangiitinnagu apeqqutit makku akineqarnissaat ataatsimiititaliamit kissaatigineqarpoq:

1. B-2171-ip iluarsaanneranut aningaasartuuteqartoqareersoq allassimavoq. Tamanna missingersuusionermut inatsimmi § 1, imm. 3-mi naapertorlugu siumoortumik akuersissuteqartoqarsimatinnagu aningaasartuuteqartoqarsinnaannginneranut naapertuuttut Naalakkersuisunit isigineqarpa?
2. B-2171 oqoqarnerisooq siunnersortit assigiinngitsut "arlaleriarlutik" misissorsimagaat allassimavoq. Pinerit tamaasa inernera taannaasarsimavoq. Sooq misissuinerit arlaleriarluni ingerlanneqarnissaat toqqarneqarsimava?
3. Oqoqarneranut igalaat ussiinnerannit pissuteqartoq, taakkulu piginnittumit tamatuma kingorna taarserneqarsimasut allassimavoq. Illut iluani aserfallatsaaliinissamut pisussaaffeqarneq eqqarsaatigigaanni illumik attartortut aningaasartuummik akiliuteqarnissaq Namminersorlutik Oqartussanit akilerniarneqarmat ataatsimiititaliamit assut tupigusuutigineqarpoq. Piginnittup illup silataanik aserfallatsaaliisimanninnera pissutigalugu illup iluata aserfallatsaaliineqartariaqalerneranut aningaasartuut attartortitsisup akisussaaffigisaata ataaniittoq ataatsimiititaliaq isumaqarpoq. Apeqqut taanna Naalakkersuisut inatsisilerituumut naliliiffigitissimavaat, taamaassimappallu tamanna qanoq kinguneqarsimava?

4. Oqoqarnera 2010-mi majimi paasineqartoq isummernissamut tunngavissiami allassimavoq. Aatsaalli maanna december 2010-mi iluarsinissaanut aningaasanik qinnuteqartoqarpoq. Suliamik qaammatit arfineq marluk missaannik sivilissusilimmik suliarinninneq isummernissamut tunngavissiami ima allassimasumut naapertuuttutut isigineqarpa ”*Oquk paasineqaraangat pisariaqarpoq init sapinngisamik piaartumik misissorneqarnissaat*”?
5. Oquit ulorianarnerannik isummernissamut tunngavissiami allassimasut Namminersorlutik Oqartussat inissiaataanni attartortittakkani oqoqarnerata iliuseqarfiginissaanut periarfissat isumaliutiginiisaannut Naalakkersuisut tunngavissippaat?

**Aningaasaqarnermut Ataatsimiititaliap aalajangiinera**

Apeqqutit siuliani allassimasut Naalakkersuisunit akissuteqarfigineqarnissaat utaqqineqarmat Naalakkersuisut inassuteqaataannut isummernissani Aningaasaqarnermut Ataatsimiititaliap **kinguartippaa**. Naalakkersuisut akissuteqaataat kalaallisut danskisullu kingusinnerpaamik tallimanngornermi ulloq 10. december 2010, nal. 12.00 nassuteqquneqarpoq assilineralu qarasaasiakkut uunga nassiunneqarluni: [nch@ina.gl](mailto:nch@ina.gl).

Aningaasaqarnermut Ataatsimiititaliap sinnerlugu

Naaja Nathanielsen  
Aningaasaqarnermut Ataatsimiititaliap siulittaasua